

# La Querrella Arxentina: una resquiebra na impunidá franquista

Xosé Miguel Suárez Fernández

Ta malo d'entender que después de más de cuarenta años de la muerte de Franco siga habiendo cais que lleven el nome del dictador. Resultaría impensable, por poner un casu, que n'Alemaña se recordare la figura de Hitler n'avenies y estatues. Equí ye perfectamente normal que veamos plaques recordando a militares golpistes que traxeron un sistema dictatorial que supunxo represión, multes, cárcel, tortura y muerte pa cientos de miles de persones. La tan emponderada Transición basóse n'escaecer a los que sufrieren por defender xusticia y llibertá: cola Llei d'Amnistía de 1977, de la que salíen de les cárceles los presos políticos, tamién se garantizaba que naide puidere pidir responsabilidaes a militares, policíes, ministros o xueces que collaboraren na represión de les décadas anteriores.

Los intentos de les asociaciones memorialistes d'investigar xudicialmente la represión franquista por xenocidiu y crímenes de lesa humanidá siempre s'afrellaron contra la muria d'impunidá del sistema xudicial español, qu'alega la prescripción de los delitos y la Llei d'Amnistía. El Comité de Derechos Humanos de la ONU vien pidiendo al Gobiernu español que derogue esa llei y recuerde, y qu'esi tipu de delitos son imprescriptibles. Hai que recordar qu'hai más de 114.000 desaparecíos y muertos ensin identificar qu'entá siguen enterraos en fosos comunes y cunetes, un récord macabru onde namás Camboya gana al Estáu español.

El 14 d'abril del 2010, dos familiares de víctimes españoles presentaron nun xulgáu de Buenos Aires una querrella por xenocidiu y crímenes de lesa humanidá cometíos pola dictadura franquista. Yá que l'Estáu español investigaba crímenes cometíos n'Arxentina o Chile basándose nel principiu de Xusticia Universal, ¿por qué non al



Fosa común d'El Sucu (Xixón). ALBERTO MORANTE

revés, si n'España toles puertes taben zarraes? La Xusticia arxentina sí abrió les puertes y, dende entós, cientos de querrelles y denuncies foron sumándose a la primera, munches d'elles al traviés de los consulaos d'esi país. Nel 2012, pa difundir lo que yá se conoz popularmente como *Querrella Arxentina*, creóse una rede estatal d'apoyu a la que se xuntó Asturies al traviés de La Comuna d'Asturies, un grupu que s'entamó pa buscar xente o familiares que quieran denunciar

casos, amás de pa dar a conocer la iniciativa na sociedá.

Los resultaos de la Querrella yá se tán viendo, a pesar de los estorbos que punxo'l Gobiernu del PP: imputación de policíes torturadores, ministros y xueces que firmaron penes de muerte, órdenes de busca internacional y extradición, comparecencies de dellos acusaos na Audiencia Nacional, visita de la xueza arxentina, María Servini de Cubría, pa tomar declaración a testigos y, pa

primer vez, tribunales españoles llamando a declarar a víctimes del franquismu de resultes de la petición de la xueza, amás de la exhumación d'una fosa por orde xudicial.

Pero la querrella tuvo otra virtú: reavivar una cuestión pola que lleven munchos años trabayando les asociaciones pa la recuperación de la memoria democrática. Son munches les persones, entidaes y conceyos que firmaron adhesiones a la Querrella Arxentina. N'Asturies, foron 19 conceyos los que la apoyaron nel Plenu. Los parlamentos de Cataluña, País Vascu y Andalucía aprobaron mociones nesi sentíu y dende Asturies yá se fixeron los contactos colos grupos parlamentarios pa que na Xunta Xeneral s'apruebe una resolución asina.

La movilización, con concentraciones pa pidir la extradición de los imputaos, y la información y el debate, con conferencies y xornaes sobre la Querrella Arxentina, son otros aspectos que tamién se trabayaron dende La Comuna d'Asturies. Pero'l nuestro esfuerriu fundamental céntrase agora na busca de denunciantes pa que sumen los sos casos a la Querrella. Yá son 47 les denuncies que promovimos n'Asturies al traviés de los consulaos d'Arxentina en Madrid y Vigo, con más de 400 casos que van dende incautaciones, desaparecíos, presos y fusilaos cuando la Guerra Civil hasta persiguios y torturaos nes tres últimes décadas del franquismu, pasando pela persecución y los asesinatos de fugaos nes décadas posteriores a la guerra.

Siguimos preparando más denuncies y tamos abiertos a informar a toles persones que sufrieron la represión o a los sos familiares, pa que puedan usar esta vía xudicial, la única abierta nel mundu, pa esixir la verdá, la xusticia y la reparación. ★

Xosé Miguel Suárez Fernández ye miembru de La Comuna d'Asturies